

望江記

李默

禹鑿既通維江實長百川故奇觀莫加焉正德己卯秋九月予  
計偕北上初從京口夕濟偃臥篷底不知江作何狀嘉靖甲申  
夏六月予則以駕部主事假滿還朝取道江陰薄次君山君山  
者楚申君葬處也江至此漸縮風濤駭目不覺呼酒狂叫已乃  
下毘陵趨京口登金山絕頂望焉極目千里帆牆片片蔽江上  
下烟景蒼蒼鐘聞兩岸極瑰偉之觀心殊樂之閱九載爲歲壬  
辰時有宣州之謫秋七月由廣陵西出眞州往者長絕江而渡  
風帆迅駛如涉清溪是時鼓棹東指踰六七十里乃達京口方  
黑雲垂垂起西北颶且作往來舟楫稀甚予獨駕輕舸乘流直

道藏輯要

天下名山記  
江南望江李

三

軫集二  
Xb三

下雖風力漸柔水波微漾然洪流空渺間寂無聲始察泛江之  
險予心殆悲焉薄暮復艤舟金山登陟如初則日已西墜江光  
半落烟暝中非復如曩時景况矣是冬臘月旣望發自宣州過  
太平留眺雷峰進憩景峰亭上忽見江自南來直指姑熟之西  
數百里間縹渺如帶意未厭也晡時再登黃山拊臨猷之石江  
勢可辨如坐景峰其夜漏下十刻馳至采石遂叩謫仙樓推窗  
望之不可得乃穿松磴造蛾眉亭則江出肘腋間矣然烟靄蔽  
虧月湧波心恍不得視左右曰白如氣光如練者是矣爲之決  
眦引睇者久之又明日至建業從二三客登雨花臺張筵坐嘯  
風颺颺下衣袂皆飛彼排石頭而繞鍾陵使英雄鼎峙六合分

裂者非此也耶因相與談興亡之故慷慨行歌眾客皆欲獻而  
散雖其濫觴岷汶滄汙三巴走白帝絕洞庭帶彭蠡吾不知其  
吐納何似然而江之形勢大都可得而覽矣夫其感於人也爲  
悲爲喜爲憂爲懼江一也無情而生有情何也羈窮拂鬱則哀  
怨易興得意肆志則豪蕩橫集此喪已之同途而至人之所謂  
物化者也是知登高眺遠情由我生山川物色觸中而應故善  
持情者必反觀焉吾得吾情於茲一也作望江記

道藏輯要

天下名山記  
江南望江李

古

軫集

*[Faded bleed-through text from the reverse side of the page]*